

四庫全書

史部

欽定四庫全書

欽定續通志卷五百十八

忠義傳

金

二

圖克坦航

洪果玖珠

烏凌阿奇珠

圖們色埒默

尼瑪哈富勒呼

吳邦傑

納哈塔富拉塔

鈕祜祿恩楚

王謹

時茂先

溫特赫老爾

梁持勝

費摩薩布
韓公恕

烏雅威赫

烏雅恩徹亨

鈕祜祿貞

伯特烏格

賈邦憲

伊刺阿里哈

孔祖湯

完顏祿錦

赫舍哩鶴壽

富察羅索

鈕祜祿資祿

趙益

侯小叔

王佐

圖們呼圖克們

愛新

馬肩龍

禹顯

張邦憲
劉全

冀禹錫

完顏呼刺勤

完顏彝

楊沃衍
劉興哥

瓜爾佳實倫

蘇椿

烏庫哩黑漢

姬汝作

圖克坦航一名扎克繖父號九駙馬衛王有事北邊授都元帥不允人望航時為吏部侍郎力勸辭帥職至寧元年呼沙呼弑逆降航為安州刺史會元兵大至城下

聲言都城已失守汝可速降航謂其民曰城守雖嚴萬一攻破汝輩無孓遺矣我家兩世駙馬受國厚恩決不可降乃盡出家財犒軍民皆盡力備禦又五日城危航度不可支乃先縊其妻孥謂家人曰我死即撤屋焚之遂自縊死城破人猶力戰曰太守既死我輩不可獨降死者甚衆

洪果珮珠臨潢人累官河東北路按察轉運使改知彰德府事戰歿贈榮祿大夫南京留守仍錄用其子孫

烏凌阿奇珠大名路明安人大定二十八年進士累官
扶餘路節度使未幾以罪奪三官降德昌軍節度副使
崇慶初戍邊有功再遷歸德興平二軍節度使充東西
經畧使改元帥右都監赴援中都戰歿贈榮祿大夫參
知政事以半俸給其家

圖們色埒默咸平路明安人襲父明安明昌中以所部
兵充押軍萬戶戍邊承安中討契丹有功除陳州防禦
使遷知平涼府事徙知彰德貞祐四年元兵復取彰德

死焉

尼瑪哈富勒呼中都路明安人明昌五年進士累官補尚書省令史從平章布薩揆伐宋兵罷除同知崇義軍節度使事擢知河南府事貞祐四年急備京西為陝州宣撫副使元兵取潼關禦戰兵敗死焉

吳邦傑登州軍事判官寓居日照之村墅為元兵所得驅令攻城邦傑曰吾荷吾國恩詎忍攻吾君之城與之酒食不顧乃殺之詔贈朝列大夫定海軍節度副使

納哈塔富拉塔大名路明安人承安二年進士累官河
州防禦使貞祐三年夏人圍定羌擊走之四年升河州
為平西軍就以為節度使上言古者一人從軍七家奉
之今籍諸道民為兵者十之七八奉之者纔二三民安
得不困夫兵貴精不在衆擇勇敢謀畧者為兵脆懦之徒
使歸農畝是亦紓民之一端也不報入為戶部尚書時
代宋大捷富拉塔奏宋人屢敗其氣必沮可乘此遣人
諭說以尋舊盟若不從然後伐之疾讎怒頑易以成功

朝廷不能用又言諸軍當汰去老弱妙選精銳陝西弓
箭手不習騎射可選善騎者代之延安毛兵甚衆分徙
萬人駐平涼關中元帥猥多除京兆重鎮其餘皆可罷
鞏縣以北黃河南岸及金鉤弔橋虎牢關虢州崿嶺凡
斜徑僻路俱當置兵防守詔下尚書省樞密院議竟不
施行未幾改昭義軍節度使興定二年潞州破力戰而
死贈御史大夫

鈕祜祿恩楚仕至楨州刺史被行省牒徙州人于金勝

堡元兵至恩楚拒戰中流矢病創臥花帽軍張提控言
兵勢不可當宜速降恩楚曰吾曹坐食官祿可忘國家
恩乎汝不聞趙坊州以金帛子女與敵人終亦不免我
輩但當力戰死耳至夜張引數人持兵杖入脅使出降
恩楚曰聽汝所為吾終不屈遂殺之執其妻子出降初
潁州人遷金勝堡多不能至判官王謹收遺散之衆別
屯周安堡素無樓堞守備謹拒戰十餘日內潰被執不
屈死詔各贈官六階升職三等

時茂先日照縣沙溝酒監寓居諸城紅襖賊郭方三據
密州案郭方三本傳訛方郭三今據布薩安貞傳改自稱元帥過其村居民相

率迎茂先獨不肯方三怒執之斷其腕大罵不屈復剔

其目亂刀剗之至死罵不絕詔贈武節將軍同知沂州

防禦使事

溫特赫老爾為同知上京留守布希萬努攻上京子特
爾格生獲老爾脅之使招餘人不從怒斫而死贈龍虎
衛上將軍博索兵馬都總管以其侄黑色為後特授四

官

梁持勝字經甫本名詢詛避宣宗嫌名改保大軍節度使襄之子多力善射泰和六年登進士第詞二科累官咸平路宣撫司經歷興定初宣撫使布希萬努有異志欲棄咸平徙海蘭路持勝力止之萬努怒杖之八十持勝走上京告行省太平時太平已與萬努通謀口稱其忠而心實不然署左右司員外郎既而太平受萬努命焚毀上京宗廟執元帥承充奪其軍持勝密約治中費

摩薩布萬戶韓公恕殺太平復推承充行省事共伐萬
努事泄俱被害案大金國志載持勝為咸平治中宗室
承裕辟為僚佐承裕死太平謀不軌以兵脇持勝不從大罵
遂遇害與此互異詔贈持勝中順大夫韓州刺史薩

布鎮國上將軍顯德軍節度使公恕明威將軍信州刺
史

烏雅威赫隆安路明安人補親軍充護衛累官安化軍
節度使土賊據九仙山為巢穴擁衆不擊賊愈熾東平
行省蒙古綱劾奏威赫不任將帥朝廷不問改鎮西軍

權經畧副使興定四年改泰定軍五月兗州破死馬
烏雅恩徹亨隆安府明安人大定二十八年進士累官
秦州防禦使母憂起復遷武寧軍節度使徙河平軍坐
前在武寧奏軍功不實降沂州防禦使還汾陽軍節度
使興定二年九月城破死焉

鈕祜祿貞本名綽哈西南路招討司人大定二十八年
進士累官泰定軍節度副使父憂服闋除宣德州刺史
貞祐元年十二月以禮部郎中與恩州刺史鈕祜祿哈

達等出議和事和議成改戶部侍郎歷沁南河鎮南集慶汾陽昭義軍節度使興定二年權元帥左都監守晉安府三月十一日城破與府官十餘人皆死之

伯特烏格西南路茂乞奚人壯健沈勇貞祐五年元兵破東勝州烏格與裕爾雅勒呼裕爾雅爾招集義軍披荆棘復立州事帥府承制皆授武義將軍烏格寧遠軍節度副使雅勒呼節度判官雅爾觀察判官興定元年各遷兩階遙授烏格武州刺史權節度使雅勒呼權同

知雅爾權副使三年真授烏格東勝軍節度使東勝被圍糧盡援絕率衆潰圍走保長寧塞九月復被圍烏格死之

賈邦憲霍州霍邑縣陳村人舉進士質直有勇畧元攻河東集居民為守禦計兵至居民悉降邦憲棄其家獨與子懿保松平寨時權知州事劉珍在寨與共守竟能成功珍每欲辟之邦憲輒以衰老為辭興定四年十月兵復大至病不能避與懿俱被執欲以為鎮西元帥

刃脅之不屈密遣懿歸松平遂自到贈奉直大夫本縣
令

伊喇阿里哈遼人興定間累遷霍州刺史四年移治好
義堡元兵至力戰不能敵兵敗被執誘使降曰吾有死
無二叱使跪但向闕而立叢矢射殺之寶昌軍節度副
使孔祖湯同時被獲亦不屈死詔贈阿里哈龍虎衛上
將軍恭定軍節度使祖湯資善大夫同知平陽府事祖湯

泰和三年進士

完顏祿錦中都路額特赫格們明安人以蔭補官累遷
通州刺史元帥右都監富察齊錦執令北去尋挈家脫
歸除同知臨洮府事遷保大軍節度使興定五年鄜州
破自投崖下死贈特進知延安府事

赫舍哩鶴壽河北西路珊沁明安人中泰和三年武舉
調襄信縣副巡檢六年宋人圍蔡州鶴壽請于防禦使
與勇士五十人夜斫宋營使諸軍譟城上斬三百餘級
遲明解去追襲至陳寨復取所據新蔡新息襄信三縣

從大軍出壽春敗宋人于渴口攻下真滁二州及盱眙
軍還遷同知息州軍事大安三年夏人五萬圍東勝鶴
壽救之突圍入城夏兵解興定元年遙授睢州刺史二
年攻棗陽三敗宋兵三年奪宋石渠寨決去棗陽濠水
加宣差鄧州路軍馬從宜遙授汝州防禦使四年宋扈
太尉步騎十萬圍鄧州鶴壽出金帛賞士許以遷官加
爵日出搏戰宋兵焚營去鶴壽被創遣招撫副使珠格
伊埒圖追及奪所俘而還詔所散金帛勿問將士優

遷官爵鶴壽遷金紫光祿大夫遙授武勝軍節度使母

憂起復行元帥府于鄜州五年閏十二月鄜州破

原作十月

按本紀是年十月鶴壽始以許州元帥將戍卒分屯潼關至閏十二月死于鄜州鉏枯祿資祿傳所載亦同今據改與數騎突出城追兵及之鶴壽據土山力戰死謚果

勇

富察羅索東北路安春噶爾罕明安人泰和三年進士累官監察御史母憂服闋充元帥參議官興定二年與元帥承裔攻下西和州博索由秦州進兵抵棧道宋人

悉銳來拒羅索察乘高立幟策馬旋走揚塵為疑兵別
遺精騎掩出其後宋兵大潰乘勢遂拔興元權元帥右
都監河東路安撫使復取平陽晉安遙授孟州防禦使
將兵救鄜州轉戰而至城破死之贈資德大夫定國軍
節度使謚襄勇

鈕祜祿資祿本姓張氏咸平府人泰和間伐宋從軍有
功累官西寧州刺史賜今姓興定二年遙授同知臨洮
府事兼定西州刺史從元帥右都監完顏阿林破宋兵

于梢子嶺三年攻破武休闢

案武休金史訛武林考本紀興定三年取宋武休闢

又楊沃衍傳亦載三年武休闢之捷今據改

功最遙授通遠軍節度使五年

改隴安軍節度使又改金安將兵救鄜州閏十二月鄜

州破被執不肯降遂死贈銀青榮祿大夫中京留守錄

其二子烈山林泉升職一等陝西省軍中用之

趙益太原人讀書肄業元兵入境鳩合土豪保聚山陝

屢戰有功郭文振署為壽陽令駐兵榆次重原寨遂率

衆叔復太原夜登城斬馘甚衆獲馬仗不可計護老幼

二萬餘口以出擢同知太原府事兼招撫使元光元年八月元兵大至攻城益急知不可支迺自焚府庫殺妻子沈符印于井遂自殺帝聞嘉歎贈銀青榮祿大夫河東北路宣撫使

侯小叔河東縣人本河津水手貞祐初籍充鎮威軍以勞補官元光元年元兵圍河中遷府判官權河東南路安撫副使盡護農民入城以家財賞戰士圍解遷治中樞密院奏乞假符節十二月詔權元帥左都監便宜從

事提控吳德說小叔出降叱出斬之表兄張先復從容

言使降以保妻子小叔怒謂先曰我舟人子致身至此

何云出降縛于柱殺之二年正月

四字史傳原訛在下文元軍十萬圍城之

上今據本紀移此樞密院遣都監額琳來議兵事因出城與額

琳會元石天應乘之取河中府作浮橋通陝西小叔駐

樂李山寨衆兵畢會夜半坎城以登焚樓櫓火照城中

天應大驚盡棄輜重牌印馬牛祿畜死于雙市門小叔

燒絕浮橋撫定其衆遷昭毅大將軍遙授孟州防禦使

同知府事未幾元軍十萬圍城總帥額爾克遣提控孫
昌樞密完顏薩布遣李仁智各率兵來援約夜中鳴鉦
內外相應及期小叔出兵昌仁智不敢動小叔斂衆入
城圍益急密遣經歷官張思祖潰圍出奔告于汴明日
城破小叔死下詔褒贈切責額爾克等不救河中之罪
王佐字輔之霍州農家子輕財好施善騎射興定中聚
兵數千權領霍州事平陽胡天作承制加忠勇校尉累
遷宣武將軍遙授寶昌軍節度副使元兵取青龍堡佐

被獲署霍州守將隸元帥崔環質其妻子佐因招撫使成天祐與環有隙約謀殺環天祐曰君妻子為質奈何佐曰佐豈顧家者耶因環出獵殺之率軍民數萬請命加元帥右監軍兼知平陽府佐與平陽公史詠素不協請徙沁州王女寨詔從之仍聽上黨公完顏開節制元光二年七月救襄垣中流矢卒贈金吾衛上將軍以其子為符寶典書

圖們呼圖克們字子秀策論進士累官臨洮知府貞祐

三年冬叛賊蘭州極陳僧等誘夏兵八萬圍臨洮城中
兵數千栗不支衆皆危之呼圖克們諭以順逆禍福皆
自奮捕其黨欲為內應者斬之擲首城外賊四面來攻
夜襲其壘夏兵大亂遂遁去四年知河中府興定二年
為絳陽軍節度使行元帥府事兼知晉安修城繕兵以
備戰守民以為擾行省胥鼎聞之遺書曰去歲平陽不
守河東保完者惟絳由公威德素著不動聲色以能無
虞邇聞治政太剛科徵太重小人易動不可不慮願謙

虛待下忠孝結人明賞罰平賦稅為河東長城之託呼
圖克們得書上言臣方治隍陴積芻糧為捍禦計而小
民頗有怨言貽行省憂自開訓諭內自悛悔外加寬撫
庶幾少慰衆心而近以朝命分軍過河又謹言帥臣不
益兵保守反助河南將棄我人心如此恐生他變敢以
鼎書上聞惟朝廷圖之朝廷以鴻言遣吏部尚書完顏
閻山代之或曰呼圖克們欲以計去晉安故務為急政
失民心未幾晉安失死者百萬遂失河東正大三年

復為臨洮府總管四年五月城破被執誘降不應以刀亂斫其膝脰終不能屈遂殺之詔贈中京留守立像褒忠廟錄其子孫其妻烏庫哩氏亦死節有傳

愛新一名莽格本號縣鎮防軍累功遷總領李文秀據秦州詔鳳翔軍討之愛新在軍中有罪當死樞帥有知者奏將帥材忠實可倚命馳赦以為德順節度使正大四年春元兵西來擬以德順為坐夏之所人甚危之愛新識鳳翔馬肩龍招與謀事鳳翔總管薩哈喇國鑑以

德順決不可守勸肩龍勿往肩龍曰愛新平生未識我一見許為知已我知往則必死然不得不為知已死乃冒險至不數日受圍城中惟義兵鄉軍八九千人元兵舉天下之勢攻之愛新假肩龍鳳翔府判官與共守禦凡二十晝夜力盡乃死肩龍自到詔各贈官配食褒忠廟肩龍字舜卿宛平人先世遼大族有知興中府者號興中馬氏祖大中全錦兩州節度父成誼京兆府路統軍司判官肩龍在太學有聲宗室蘿爾坦被誣將置死

人不敢言其冤肩龍上書蘓爾坦有將帥材少出其右
臣書生無用於世顧代死留為天子將兵帝問汝與蘓
爾坦交厚對曰臣知蘓爾坦蘓爾坦未嘗識臣帝悟赦
蘓爾坦授肩龍東平錄事委行省試驗候摯與語不契
罷歸渡河疑為姦細繫歸德獄適蘓爾坦至立救出之
至是與愛新同死難

禹顯鴈門人貞祐初隸上黨公張開累功授義勝軍節
度使元光二年四月元帥德勒台阿勒達爾攻河東開

遣顯扼龍猪谷夾攻敗之擒其帥韓光國悉復所厯州縣將軍二百人守襄垣八年不遷元帥嘗集河朔步騎數千攻之數四不能拔既而戰于玉女寨大獲開言于朝權元帥府都監正大六年冬軍內變城破被擒帥義之不欲加害鉛以鐵繩密遁去聞開軍復振將往從之元兵四向來追被執不屈死秦州人張邦憲字正叔正大進士為永固令天興二年避兵徐州卓翼率兵至城邦憲被執將驅之北罵曰我進士也為邑長可從汝曹

反耶遂遇害劉全彭城民率鄉鄰數百避兵沫溝推為
岩主元兵至徐質其父招全全縛其人送州因竊父以
歸徐帥伊都嘉其忠承制授昭信校尉後遇國用安以
不附已見殺

冀禹錫字京用龍山人至寧元年仕歷州郡有能聲歸
德受兵禹錫為行院都事經畫守禦一府倚重聞富察
官努之變或勸以微服免不從與郎中完顏呼喇勒同
赴水死按冀禹錫金史原附富察官努傳今改入忠義考富察官努傳前謂其赴水死後又云或勸以

微服免不從見害未免矛盾今據前文改輯並以完顏呼喇勒附見焉

完顏彝字良佐世以小名稱之曰陳和尚豐州人系出蕭王諸孫父奇格泰和間南征以功授階州同知軍事宋復階州戰歿于嘉陵江從兄鴻字國器亦以小名色埒默行世襲明安以善戰知名自壽泗元帥轉安平都尉鎮商州威望甚重敬賢下士有古賢將風嘗搜伏得歐陽修子孫並其族屬皆縱遣之案鴻事見彝傳中本無庸分金史別為鴻
附傳于後既非死事殊屬枝
贊今從宏簡錄改作合傳貞祐中彝為元兵所掠帥

甚愛之置帳下。彝母留豐州。鴻事之甚謹。彝在北歲餘託以省母乞還。帥以卒監之。至豐與鴻劫殺監卒奪馬。奉其母南奔。元兵追之。由他路得免。兄弟共輓鹿車載母渡河。宣宗奇之。授鴻都統。彝補護衛從鴻壽泗帥府。鴻辟太原王渥為經歷。渥授彝以孝經小學論語春秋。左氏傳。正大二年。鴻落帥職。為總領屯方城。彝隨往。凡軍中事皆預知。鴻時在病。鎮防軍葛宜翁素凶悍。與李太和相毆。訴于彝。不直。量笞之。宜翁耻受杖。竟死其妻。

訟彝故殺議當大辟彝聚書獄中讀之明年鼎病愈詔
提兵而西入朝哀宗怪其瘦甚未幾卒帝聞馳赦彝曰
汝兄死失吾一名將今故曲法赦汝他日汝奮發立功
國家得汝力始以我為不妄赦矣彝泣且拜退以白衣
領紫微軍都統踰年轉忠孝軍提控六年元兵入大昌
原伊喇布哈命為前鋒案本紀正大六年二月召平章
哈達還朝伊喇布哈率陳和尚
忠孝軍一千駐邠州三月陳和尚有戰功授定遠大將
軍平京府判官世襲穆昆布哈傳亦同此時哈達並未
為帥金史作五年為哈達前鋒改
誤今據本紀反伊喇布哈傳改先已沐浴易衣若將就

木者擐甲上馬不反顧是日以四百騎破八千衆自軍
興二十年始有此捷奏功第一手詔褒諭授定遠大將
軍平涼府判官世襲穆昆一日名動天下忠孝軍皆回
紇羌渾及中原被俘避罪來歸者驚狠凌突號難制尋
善御之坐作進退皆中程式所過州邑給常料外秋毫
無犯銜曲不復喧雜每戰則先登陷陣疾若風雨諸軍
倚以為重七年有衛州之勝案本紀正大七年哈達布
哈引兵救衛州圍解哈達傳亦同此時哈達始與布哈同將兵亦
以忠孝軍勝本傳誤作六年今據改八年有倒回谷

之勝畢嘗私謂同列曰布哈無持重畧今日得生口三
百明日得牛羊一二千士卒喘死則不復計國家積年
兵力必為是人破除盡矣布哈聞之置酒會諸將語以
曾短長我否徐應曰有布哈見其無懼容漫為好語云
有過當面諭無後言也九年正月三峯山之敗走鈞州
城破縱軍巷戰自言我金國大將欲見白事兵士以數
騎夾之詣行帳前問其姓名曰我忠孝軍總領陳和尚
也若死亂軍中人將謂我負國家今日明白死天下必

有知我者敵欲降之斫足脛折不為屈割口吻至耳噀血而呼至死不絕元將義之醉以馬漣祝曰好男子他日再生當令我得之詔贈鎮南軍節度使塑像褒忠廟勒石紀其忠烈

楊沃衍一名沃哩朔州靜邊官莊人本屬唐古達喇部族少為屯田小吏元兵入境率本族入保朔州南山茶杞溝衆數千推為招撫使轉走寧陘武朔寧邊諸州朝廷遣人招之率衆來歸授武州刺史武州屢經殘毀元

兵來攻死戰二十七晝夜不能拔乃退時貞祐二年二月也既而朝廷以武州終不可守令遷其軍民駐岢嵐州升為節鎮即以為節度使詔諭以益勵忠勤與宣撫司輯睦保安軍民沃衍既奉詔以身許國曰大丈夫必死王事不死于家三年奉旨屯涇邠隴三州分其軍九千人為十翼五都統破夏兵四萬解定西州之圍興定元年賜姓烏凌阿將兵五千從博索伐宋出鞏州鎰并遇夏兵屢擊走之武休關之捷功又居多元光元年遙授

中京留守拜元帥右監軍世襲努呼哈爾呼必喇穆昆
二年春元兵數百掠延安而南約圖們呼圖克們以步
軍會戰呼們克們宿將常輕沃衍遂失期沃衍獨率兵
追之獲四人而還還會諸將欲殺呼圖克們諸將哀請
乃釋之俄而兵大至駐德安寨復擊走之未幾元兵攻
鳳翔還道出保安遣提控完顏扎拉破于石樓臺時元
兵聲勢益振陝西行省檄令清野不從曰我若清野明
年民何所得食遂隔大澗持勢使民畢麥事正大八年

冬哈達布哈由鄧州而西沃衍自豐陽川遇于五朵山
下聞禹山戰敗憤云平章參政蒙國厚恩握兵柄失事
機縱兵深入尚何言耶後三峯山敗沃行走鈞州其部
曲白瑠努阿拉善降元請招沃衍阿拉善入見道帥意
當授大官沃衍拔劍斫之曰我起身細微蒙國大恩汝
欲污我耶遂遺語部曲後事望汴京拜且哭曰無面目
見朝廷惟有一死耳即自縊部曲舉火焚之從死者十
餘人初元兵破西夏長驅入闕所至望風降獨沃衍與

其部將劉興哥往來邠隴間屢戰屢勝故猝不能東興
哥鳳翔虢縣人起羣盜人呼熱劉後于清化戰死元兵
至酌酒以弔西州耆老語之至為泣下

瓜爾佳實倫隆安人以武舉登第貞祐二年累遷副提
控太原府判官與完顏富拉塔議拒守不合措置乖方
敵因大入幾不可禦既乃交章論列帝惡其不和詔分
統其兵未幾遷同知太原府事奏請招集義軍設置長
校各立等差制可四年遷河東宣撫使上章言宣撫使

烏庫哩禮不肯分兵禦敵且所行多不法詔禮罷職

按本

紀貞祐四年十二月元兵攻太原府宣撫使烏庫哩禮

遣人間道齋書至京師告急又考烏庫哩禮傳貞祐

二年兼河東北路安撫使三年充本路宣撫使四年太

原被圍未幾圍解進官二階未見有詔禮罷職事當屬

誤載實倫遷絳陽軍節度使權經畧使尋知延安府事兼

鄜延路兵馬都總管元兵圍忻州實倫率兵往援護其

民入太原所保甚衆興定元年改河平軍節度兼衛州

管內觀察使詔諭曰朕初謂汝勇果故倚以濟事尋聞

汝嗜酒不法太原知府烏庫哩德升亦屢嘗為朕言之

然皆瑣屑乃若不救汾州豈細事哉今當戮力以掩前
過尋遷鎮西軍節度使兼嵐州管內觀察使行元帥府
事二年實倫言去歲元兵破太原時嵐州官民將士悉
力捍禦卒能保守無虞乞朝廷量加旌賞務令益盡心
力易以鎮守詔有功者各遷官一級仍給降空名宣敕
令樞密院遣授之三年實倫奏樞密檄臣會汾州權元
帥移延呼喇復太原臣已遣提控實嘉烏爾欽等領軍
以往但敵勢頗重而往者皆新集白徒絕無精銳恐不

能勝乞于河南陝西量分精兵以增臣力仍令陝西州
郡近河東者給之資糧更令南路諸軍綴敵之南以分
其勢庶幾太原可復詔陝西河東行省分糧與之請兵
之事以方伐宋不從實倫復上言軍士有功者宜速賞
之詔從其請實倫復言所統官屬富察和克端裕爾雅
勤呼納答塔旺結郭憲等並不稟從乞朝廷嚴為懲誡
庶人知職分易以責辨宰臣惡之乃奏曰和克端雅勤
呼已經奏改無復可議實倫身兼行部不自規畫而使

旺結往來應給石州無人恐亦有失武州邊郡正當兵
衝使憲率軍離城敵或乘之孰與守禦旺結等不從未
為過也帝以為然因遣諭實倫姑為容忍實倫駐兵太
原之西俟諸道兵至進戰聞脅從人頗有革心上言于
朝乞降空名宣敕金銀符許便宜遷注以詔誘之帝從
其請並給付之保德州鎮威軍萬戶王章努軍萬戶齊
鎮殺刺史富珠哩尼楚赫滅其家脇官吏軍民同狀白
帥府諱以不軌實倫密令同知把富拉塔設計誅之朝

廷命行省胥鼎量宜遷賞乃遷寔倫金安軍節度使行
帥府事于葭州時鄜州元帥內族承立慮夏人入寇遣
納哈塔邁珠以兵駐葭州實倫輒分留其兵千八百人
令以餘軍屯綏德而後奏之有司論罪當絞遇赦乃止
除名元光元年元兵圍青龍堡詔以實倫權左都監將
兵會上黨公晉陽公往援之敵兵梗道不得進會青龍
堡破召還既而復以罪免正大八年按哀宗本紀以實
倫權昌武軍節度
在正大九年正月其時已改元開
興至四月復改元天興與此互異元兵入河南朝議以

權昌武軍節度使鈕祜祿同周不知兵起實倫代之實倫初赴昌武詔諭曰卿先朝宿將甚有威望故起拜是職元帥蘇椿武監軍皆曉兵事今在昌武宜與同議勿復不睦失計也實倫赴鎮遣歸順軍提控嵐州人高珪往斥候珪奔元軍告以城池深淺俄元兵至城下使韓壽孫持檄招降實倫蘿椿斬之既而偏裨何魏內族安春瓜爾佳太守等開門納元軍入城擒蘿椿大將怒其不屈即殺之實倫投井而死同周自縊

按實倫屢經兵事卒完臣節由

列傳移入忠義蘇椿原以同死附傳本
紀言為亂兵所害蓋屬傳聞異詞耳

烏庫哩黑漢初以親軍入仕為唐鄧元帥府把軍官天
興二年唐州刺史內族吉嚕病卒鄧州總帥府以富察
都尉權州事宋軍圍唐州糧多為鄧取乏食鎮防軍馮
總領甄改住為變殺富察都尉帥府承制以黑漢權刺
史既而鎮防軍謀歸宋裕州大成山聶都統一軍獨與
為敵鎮防不能勝奔棗陽宋人以故知唐虛寔會鄧帥
伊喇瓊叛歸宋遺書招黑漢黑漢殺其使者不報宋王

安撫率兵攻唐郢司王太尉繼至攻益急城中糧盡人相食黑漢殺其愛妾啖士士感其義爭殺妻子官屬聚議欲降黑漢與聶都統執益堅總領趙綽爾與馮總領私約王安撫入城聶都統請馮議事即坐中斬之綽爾乘夜開西門納宋軍黑漢率大成山軍巷戰自辰至午宋軍大敗綽爾約併力殺大成山軍大成軍敗獲黑漢脅使降不屈為所殺

姬汝作字欽之汝陽人全州節度副使端修之姪孫也

汝作以才量稱正大未避兵崧上保鄉鄰後徙居交牙
山若授北山招撫使遷入汝州汝州當殘後防禦使張
楷自揣不能服衆以州事託青陽總帥呼延實元兵屢
破僅存空城汝作至招集散亡復立市井元兵復來攻
以死拒之兵退間道納奏授同知汝州防禦使呼延實
忌其功州事動為所制實欲遷州入山汝作以為倉中
糧尚多四面潰軍日至激之皆可用朝廷倚我守此州
總帥欲棄之何心哉讒間既行有相圖隙詳議官楊鵬

釋之實乃還山會戰襄鄭得馬百餘士氣頗振遂以汝
作為總帥天興二年哀宗在蔡徵入援州糧垂盡中京
破部曲私議以城降懼汝作不敢言白欲遷州入山汝
作怒曰吾父祖食祿百年今又居帥職吾生為金民死
為金鬼汝輩言避于山非欲降乎有再言遷者斬元塔
察將兵攻蔡經汝州州人梁皋作亂殺汝作宣使石珪
以皋權防禦使脫走入蔡以事聞帝甚嗟惜贈汝作昌
武軍節度使子孫世襲穆昆仍詔呼延寶范真討皋不

獲皋後為元兵所殺



欽定續通志卷五百十八

欽定四庫全書

史部

欽定續通志卷五百二十九至二十二

侍講學士臣羅國俊覆勘

總校官原任侍講臣王燕緒

欽定四庫全書

欽定續通志卷五百十九

忠義傳

金

三

商衡

珠嘉托羅海

楊達夫

強伸

馮延益

烏克遜仲端

烏克遜納紳

費摩阿古岱完顏珠赫完顏莽格馬
克遜端費摩德輝完顏阿薩爾瑪延

富察琦

舒穆嚕世勣

完顏仲德

富珠哩羅索烏凌阿呼圖元志王
巴爾赫舍哩柏壽烏庫哩和勤端

蔡巴爾

納塔和碩台

毛佺

闢忠
郝乙

溫都察遜

納塔和碩台

完顏經實

完顏色埒默焦春和宋
桂巴良弼珠勒根文卿

畢資倫

郭哈瑪爾羅丹

商衡字平叔曹州人至寧元年特恩第一為威戎令歲
饑自行省開倉賬貸全活甚衆地震城圮夏人乘釁入

侵守禦無虞縣人為立生祠累拜監察御史上章極言
鄭國夫人不時出入宮闈干預政事聲跡甚惡自是非
被召不敢進見又言戶部侍郎曹溫女在掖庭親舊干
預權利家人填委諸司貪墨之罪詔罷溫戶部改太后
府衛尉再上章言溫果可罪當貶逐無罪則臣為妄言
豈有兩可理帝動容乃出溫為汝州防禦使未幾改衡
樞密院經歷母喪起復為秦藍總帥府經歷官天興元
年二月圍克坦烏登等敗于鐵嶺衡未知存歿招集潰

軍以須遂為元軍所得誘使招降洛陽不可欲捽其巾
衡瞋目大呼終不肯降望闕瞻拜遂引佩刀自剄

珠嘉托羅海上京人其先有開國功授北京路蘇克揀
阿明安托羅海自幼襲爵宣宗遷汴率本部兵赴中都
扈從授御前馬步軍都總領宋人畧南鄙與時全將軍
南伐屢摧宋兵破城寨以功遙授武昌軍節度使行蔡
息等路元帥府事遷卒擒宋人畜牧越境者法當械送
慮生邊釁釋之哀宗即位授鎮南軍節度使蔡州管內

觀察使元兵入陝西上言宋人與我為讐頃以力屈自
保今陝西被兵河南轉戰連年國力已竭壽河南接盱
楚若宋人與李全乘虛而入腹背受敵非計之得宜敕
壽泗帥臣謹斥侯嚴烽燧常若敵至帝是而行之正大
二年秋傳言宋人將入侵農司令民先期刈禾托羅海
遣軍巡邏聽民待熟宋人卒不入得謀報光州汪太尉
將取真陽議者請籍丁男以備托羅海曰汪太尉恆怯
人寧敢為此已而果然叛人焦風子授提控謀率衆入

宋托羅海伏兵鄱陽道殲之七年元兵攻藍關至八渡倉退舉朝皆賀以為無事托羅海獨言潼關險隘兵精足用然商洛以南瀕宋境大山重複宋人不知守國家亦不能逾境屯戍元兵若由散關入興元下金房繞出襄漢北入鄧鄙則大事去矣宜與宋人釋怨據險要以備不然必敗是秋改授小闢子元帥屯商州大吉口九年春從行省參政圖克坦烏登將潼關兵入援至商山遇雪元兵邀擊之士卒飢凍不能戰而潰托羅海被執

不屈自殺

楊達夫字晉卿耀州三原人泰和三年進士嘗主鄆縣簿事吏民樂之達夫亦愛其山水之勝家焉日以詩酒自娛會詔徙民東入關達夫與衆行及韶避兵州北之橫嶺為遊騎所執將褫衣害之挺然直立大言曰我金國臣子不過一死忍裸袒以贖天日耶遂見殺兩山潛伏之民皆相告曰若此好官異日當祠之作我橫嶺之

神

強仲本河中射糧軍子弟貌極寢陋而膂力過人興定
初從華州副都統安寧復潼闕以勞任使後選充官軍
戍陝鐵嶺軍潰被執從尉烏凌阿呼圖竄歸中京時中
京已破留守薩哈連死之元帥任守真復立府事以便
宜署仲警巡使後守真率部曲從行省色埒入援鄭州
之敗守真死天興元年中京人推仲為府簽事領所有
軍二千五百人傷殘老幼半之甫三日元兵圍之東西
北三面多樹大砲仲拮衣帛為幟立城上率士卒赤身

而戰募壯士得五千人往來救應大呼以慄子軍為號
其聲勢與萬衆無異兵器已盡鎔錢為鏃得元兵一箭
鐵為四以筒鞭發之又創過敵砲能發大石于百步外
擊無不中伸奔走四應所至必捷得二驅及所乘馬皆
殺之以犒軍士人不過一啗而得者如百金之賜元兵
退百里外益兵數倍復攻又不能拔事聞哀宗降詔褒
諭以伸為中京留守元帥左都監內族色埒嶺軍民十
餘萬入洛行省事二年元兵自汴驅色埒之子于東門

下誘色埒降色埒即命左右射之既而知崔立之變病
不能語而死總帥烏凌阿呼圖代行省事伸行總帥府事
月餘糧盡軍民稍稍散去元兵復來陣于洛南伸陣水
北有韓帥者匹馬立水濱招伸降伸謂帥曰君獨非我
國臣子耶我本一軍卒今貴為留守誓以死報國耳遂躍
而射之帥奔陣率步卒數百奪橋伸軍中一旗手獨出
拒之殺數人伸即手解都統銀符佩之士氣復振
初築戰壘于城外四隅至五門內外皆有屏謂之迷魂

墻元兵以五百騎迫之伸率卒二百鼓譟而出元兵退行省呼圖走南山鷹揚都尉獻西門以降伸知城不能守率死士數十人突東門出轉戰至偃師力盡就執載以一馬擁迫而行伸宛轉不肯進強掠之將見大帥塔察及中京七里河伸語不遜兵卒相謂曰此人乖角如此若見大帥其能降乎不若殺之因好語誘曰汝能北面一屈膝吾貸汝命伸不從左右力持使北面伸拗頭南向遂殺之按強伸力守中京城破不屈今由列傳移入忠義

馮延登字子俊吉州吉鄉人承安二年詞賦進士為寧
邊令電害稼發粟賑貸全活甚衆累遷太常博士正大
七年遷國子祭酒假翰林學士承旨充國信使以八年
春奉國書朝見元主于虢縣御營問汝識鳳翔帥否對
曰識之又問汝能招降即貴汝死不則殺汝矣曰臣奉
書請和招降豈使職乎招降亦死還朝亦死不若即死
為愈明日復問對如前問至再三執義不回乃諭之云
汝罪應死但古無殺使者理汝愛汝須鬚猶汝命也叱

左右以刀截去之延登岸然不動監之豐州二年後放還袁宗撫慰久之復官祭酒歷禮吏二部侍郎明年元兵圍汴京倉猝逃難為騎兵所得欲擁北行延登辭情慷慨義不受辱遂躍城旁井中死

按大金國志元兵圍此小異考延登使元誘脅囚禁始終不屈當無

汴京城破自投井死

圍城未破倉皇遁逃事今仍史文而附識之

馬克遜仲端本名卜吉字子正承安二年策論進士宣宗時累官禮部侍郎與翰林待制安廷珍

原訛廷珍下同今據本紀

奉使乞和謁見元太師穆呼哩留止廷珍仲端獨往

並大夏涉流沙踰葱嶺至西城見元太祖致使事乃還
權參知政事奏知開封府完顏莽伊蘇吏部郎楊居仁
奉使不職辱君命宜誅詔免死除名會議降及諱太后
奉佛帝怒貶同州節度使哀宗將遷歸德召為翰林學
士承旨留守汴京元兵圍汴日久食盡諸將不相統自
度不測一日與同年費摩思忠小飲送出門曰此別終
天矣即自縊妻從死子愛實嘗為護尉奉御以誅官努
功授節度世襲千戶

烏克遜納紳字道遠由譯史入官性伉特敢為有直氣
嘗為監察御史時中丞完顏伯嘉以酷烈聞納紳糾罷
之朝士聳然哀宗東遷留汴京居守崔立之變明日與
御史大夫費摩阿古岱戶部尚書完顏珠赫皆自縊阿
古岱字仲寧珠赫字仲平皆女真進士時不辱而死者
奉御完顏莽格大睦親府事烏克遜端大理費摩德輝
右副點檢完顏阿薩爾參政完顏紳之子瑪延

富察琦本名阿林字仁卿隸州陽信人補刑部掾兄世

襲穆昆兄死琦承襲正大六年為平安都尉鉏祜祿哈坦都統兼知事小闢破事勢已迫琦常在左右哈坦令避矢石琦不去曰業已從公死生共之尚安所避哀宗遷歸德汴京立講議所琦與焉與同事元好問善崔立變後令改易巾髻琦謂好問曰在京人皆可獨琦不可今以一死付公因泣涕而別母完顏氏以孝謹聞夢人伏梁間驚寤琦跪曰兒意在懸梁阿母夢先見耳家人輩泣勸母止之曰勿勸兒所處是矣即自縊

舒穆嚕世勣字景畧父元毅死王事承安五年世勣登
詞賦經義南科進士第貞祐三年累官太常丞時徙河
北軍戶河南議給以田世勣上言荒田牧地耕墾費力
倍歲不能熟若奪民素時者與之則民將失所况軍戶
率無耕牛彼既南來田宅為人所有一旦北歸能無爭
奪竊謂宜令分人歸守本業收晚禾至春復還為固守
會御史劉元規亦言給田不便帝大悟乃罷之正大中
累遷禮部尚書天興元年哀宗將北渡世勣與劉肅等

二十一人言不便帝曰我不出軍分為二一軍守一軍出戰我出則合為一世勣曰陛下出則軍分為三一守一戰一中軍護從不若不出為愈也帝曰卿等不知若得完顏仲德恒山公武仙付之兵事何勞我出今欲不自將得乎又指御榻曰我此行豈有還期但恨無罪亡國耳我未嘗奢侈未嘗信任小人世勣應聲曰陛下用小人則亦有之帝曰小人謂誰世勣累數曰伊喇寧古溫都察遜烏色完顏長樂復言良久君臣涕泣世勣從

行至歸德明年走蔡州次新蔡縣之姜寨子嵩時為縣令拜于馬前帝嘉之蔡城破父子俱死嵩字企隆興定

二年經義進士

按世勣父子三世俱死王事今由列傳移入忠義

完顏仲德本名呼沙呼海蘭路人泰和三年進士貞祐間用兵辟充軍職嘗為元兵所俘不踰年盡解其語率降人萬餘來歸宣宗召見授邳州刺史增築城壁匯水環之州由是可守哀宗即位授同簽樞密院事行院徐州徐州城東西北三面皆黃河而南獨平陸仲德疊石

增城之半復浚隍引水為固民賴以安正大五年詔關
陝以南行元帥府以備小關元兵叩關仲德適與前帥
鄂屯阿里布酌酒更待而兵猝至遂驅而東有司劾
阿里布素無守禦策罪當死仲德上書謂元兵越關時
符印已交安得歸罪前帥臣請受戮帝義之杖阿里布
而貰其死六年移知鞏昌府招集散亡依山為柵屯田
積穀人多歸之天興元年參知政事行省陝州時烏登
新敗陝州殘破仲德復立山寨安撫軍民會蠟書徵兵

入援行省帥府往往觀望不進或中道輒潰惟仲德提
孤軍千人歷秦藍商鄧擣果菜為食間闊百死至汴達
帝東遷妻子在京師五年矣仲德不入其家趨見帝宋
門知欲北渡力諫云北兵在河南而陛下遠徇河北萬
一無功得完歸乎不若西幸秦華山巖深固糧食豐贍
安居守險命帥臣分道出戰然後進取興元經畧巴蜀
此萬全策也帝已與博索議定不從然素重仲德且嘉
其赴難進拜尚書省右丞兼樞密副使二年駕至歸德

以仲德行省徐州魚山總領張瓛作亂殺元帥完顏呼圖降元仲德累議討之徐守王德全不從仲德徑往而從宜嚴祿已誅瓛反正仲德撫慰軍民而還有曹總領者盜御馬東行仲德既殺之德全欲功出己復殺其黨四十八人仲德以計執德全并其子殺之餘一無所問閩郡稱快官努之變詔仲德赴行在官屬懼為所給勸勿往仲德曰君父之命死亦當行官努誅詔議遷蔡仲德欲奉帝西幸因贊成之至蔡領省院事無鉅細率親

為之選士繕兵未嘗一日無西志近侍左右久困睢陽
幸即汝陽之安皆娶妻營業不願遷徙日夕言西行不
便未幾元兵梗路竟不果行仲德每深居燕坐瞑目太
息以不得西遷為恨帝命有司修見山亭及同知衙為
遊息所餘步仲德摘三面精銳日夕戰禦終不能拔三
年元兵鑿西城為五門整軍入督軍廬戰及暮乃退明
日復集仲德率精兵巷戰自卯及巳俄見子城火起聞
帝自縊謂將士曰吾君已崩吾何以戰為吾赴汝水從

吾君矣言訖赴水死將士皆曰相公能死吾輩獨不能耶于是參政富珠哩羅索烏凌阿呼圖總帥元志元帥王巴爾赫舍哩柘壽烏庫哩和勒端及軍士五百餘人皆從死焉仲德狀貌不踰常人喜怒未嘗妄發聞人過常護諱之雖在軍旅手不釋卷家貧敝衣糲食終其身晏如也雅好賓客薦舉人材其掌軍務賞罰明信軍民樂為用至危急死生之際無一士有異志者南渡後將相文武忠亮始終無瑕仲德一人而已

按仲德間關赴難盡力守榮城

破盡節併能激厲諸將軍士從死者至五百餘人今由列傳移入忠義

蔡巴爾不知其所始趨捷有勇性純質可任為忠孝軍元帥天興二年自息州入援會元將布展遣數百騎駐城東大呼曰城中速降當免殺戮不然無噍類矣帝遣巴爾率挽強兵百餘潛出暗門渡汝水左右交射之自是兵不復薄城築長壘為久困計帝令分軍防守西城以殿前都點檢烏凌呵呼圖守西面巴爾副之已而袁宗傳位承麟羣臣入賀班定巴爾不拜謂所親曰事至

于此有死而已遂戰死

毛佺恩州人初為盜宣宗南渡率衆歸國署義軍招撫
哀宗遷蔡以為都尉圍城之戰佺力俱多城破自縊其
子先佺戰歿時死者闢忠滑州人初衛王時開州刺
史賽格叛忠單騎入城縛以出由是漸被擢用郝乙磁
州人同日戰死哀宗贈官

溫都察遼皇太后姪衛尉七十五之子短小精悍性豈
弟累遷諸局分官帝幸蔡授殿前左副點檢圍城中數

引軍潛出巡邏時尚食湏魚城西有練江魚大且多往
捕必以軍衛昌孫常領兵往所得動千餘斤分賜將士
後知其出左右設伏伺而邀之力戰死蔡城破前御史
監察納塔和碩台聞之慟哭投水死

完顏經實哀宗奉御系出始祖天興三年正月己酉蔡
城破哀宗傳位承麟即自縊于幽蘭軒權點檢內族色
埒默矯制召承御實嘉氏近侍局大使焦春和內侍局
殿頭宋珪赴帝前曉以大義及侍從官巴良弼珠勒根

文卿皆從死色。埒默將死遺言。經實使焚幽蘭軒火方。熾子城破元兵突入。近侍左右皆走避。獨經實留不去。為兵所執。問為誰。曰吾奉御經實也。吾君終于是。吾候火滅灰寒收瘞其骨耳。兵笑曰汝命且不能保。能瘞而君耶。經實曰人各事其君。吾君有天下十餘年。身死社稷。忍使暴露遺骸與士卒等耶。吾逆知君輩必不遺吾果。瘞吾君雖寸斬不恨矣。兵以告其帥布展。曰此奇男子也。許之。經實乃掇其餘燼。裹以敝衾。瘞于汝水之旁。

再拜號哭將赴汝水死軍士救之得免後不知所終

按經

實忠於故君雖未捐軀實彰義烈且其傳內附見從死諸人並仍史例存之

畢資倫緝山人泰和間南征以傭雇從軍授進義副尉崇慶初珠格高琪選為鎮州防城軍千戶至寧元年元兵至鎮州高琪棄城遁資倫行及昌平收避遷民兵轉戰有功擢授都統積功至都總領布薩阿哈南征軍次梅林闕不得過問諸將誰能取此闕者資倫出應命問湏軍士幾何曰止用所統足矣明日遲明出不意薄宋

軍破之遂取梅林阿哈軍南行留提控王祿萬人守關
不數日復為宋兵奪據歸途阻塞阿哈復問誰能取者
賞帥職資倫復出應命以本軍再奪梅林軍還論功第
一授宣差總領都提控既而以本軍屯泗州興定五年
叛將時青襲破西城資倫墮南城求死為宋軍所執青
說之曰我知爾好男子宜相時違變金國勢已衰肯降
我宋不負爾資倫極口罵曰我出身至貧賤結柳器為
生今職居三品不幸失城一死尚不能報肯從汝反賊

求生耶青知無降意下盱眙獄從宜伊喇楊格以死節
聞收其子努爾光皇后奉閣舍人宋人亦賞資倫忠憤
不撓欲全活之轉囚鎮江府土獄十四年及盱眙將士
降宋宋使納哈塔邁珠已下北望哭拜謂之辭故主驅
資倫在旁觀之資倫罵曰國家未嘗負汝何所求死不
可乃作如此觜鼻耶邁珠等不敢仰視聞哀宗死歎曰
吾無所望矣我一祭吾君乃降耳宋人信之設祭鎮江
岸祭畢伏地大哭乘其不防投江死宋人義之

郭哈瑪爾會州人與兄羅丹世為保甲射生手平時發矢伺腋下甲不掩處射無不中興定初羅丹以功遷授同知平涼府事兼會州刺史賜姓延札夏人攻會州羅丹遙見其主兵者人馬皆衣金一發中其吭又射一人矢貫兩手于樹敵大駁城破羅丹哈瑪爾俱被擒夏人憐其技因之誓死不屈後兄弟謀奔事覺羅丹被殺哈瑪爾獨拔歸帝思羅丹忠遙授其子博紐會州軍事判官哈瑪爾授同知蘭州軍事興定五年以破夏人功遷

同知臨洮府事元光二年夏騎數十萬攻鳳翔甚急元帥持嘉喀齊喀以哈瑪爾總領軍事從巡城濠外一人坐牀若蔑視城守者哈瑪爾持弓矢伺其舉肘一發斃之兵退升遙授靜難軍節度使尋改通遠軍授山東西路幹罕必喇穆昆與鞏州元帥田瑞攻取會州率騎兵五百被赭衲敵州南山而下夏人猝望以為神城上有舉手于懸風版者射之手版俱貫夏人震恐乃出降州為夏人所據近十年至是復焉正大初田瑞據鞏叛從

陝西行省討之率衆先登遷元帥左都監兼行蘭會洮河元帥府事天興二年哀宗擬遷鞏昌以鈕祜祿烏展為行省三年春烏展聞蔡已破遣人稱使者至自蔡有旨宣諭以安衆心綏德州帥汪世顯嫉烏展制已欲發矯詔事因以兵圖之懼哈瑪爾威望約哈瑪爾併力使至哈瑪爾謂之曰鈕祜祿公奉詔為行省號令孰敢不從今主上受圍于蔡擬遷鞏昌我輩不能致死赴援又不能叶衆奉迎乃欲攻鈕祜祿公先廢遷幸之地帝至

何所歸乎汝帥若欲背國家任自為之何及于我世顯
即攻破鞏昌殺烏展送款于元遣使二十餘輩諭哈瑪
爾以禍福不從甲午春金國已亡西州無不歸順獨哈
瑪爾堅守孤城丙申冬十月元兵併力攻之日與血戰
集州中金銀銅鐵雜鑄為砲以擊攻者元兵猝不能拔
及勢急乃積薪州廨呼集家人及城中將校妻女閉諸
一室自焚之哈瑪爾之妾欲有所訴立斬以徇城破猶
塵戰獨上大草積以門扉自敵發二三百矢無不中者

矢盡投弓劍自焚城中無一人降者

欽定續通志卷五百十九

欽定四庫全書

欽定續通志卷五百二十

忠義傳

元

李伯溫

伯通
守忠

守正

石珪

攸哈喇巴圖爾

任志

存

耶律特默

張萬嘉努

保通

鄭義江

德溫

趙恊爾

董士元 哈喇固

樊楫

班巴爾

綽爾
鮮海伯特

伊埒黑色呼都克哈斯

哈喇布哈

劉天孚

蕭景茂

張桓

李黼
冕東昭

李齊

褚布哈

郭嘉

喜同塔布岱

韓因

卞琛小十
李仲亨

喬彞

張嵩起
吳德新

王佐

顏瑜

曹彦可

王士元

楊樸

李伯溫守賢之從兄也長兄惟則官平陽征行萬戶次
伯通歲甲戌錦州張致叛穆呼哩命伯通擊之戰死伯
溫行平陽元帥府事鎮青龍堡專任東征聞平陽已陷
弟守忠被執選驍勇拒守久之金人盡銳來攻守卒多
夜遁李成開水門道敵入伯溫登堞樓謂左右曰吾兄
第仗節擁麾受方面之寄今不幸失利當以死報國吾

弟已被執我不可再辱汝等宜自逃生即拔劍殺家屬投井中自引刀植柱刺心而死金人登樓見其抱柱如生無不嗟歎弟守正幼嘗質於穆呼哩後為平陽守活俘囚甚衆以功授河東南路兵馬都元帥歲庚寅上黨晉陽合兵攻汾州將陷守正以義赴援衆寡敵別遣老弱百人曳薪揚塵多張旗幟敵懼遂解去汾人持牛酒迎犒曰幸公完是州德甚大願奉是州以從隰州叛守正往擊之中矢傷足歸創甚會金將完顏哈達攻平

陽守正襄創戰歿大帥以其兄守忠代之金將赫舍哩
真襲擊平陽行營守忠出援次高梁師潰入城副帥爪
爾佳常德潛獻東門納金兵城遂陷金人執守忠至汴
誘使降守忠罵之金人怒置鐵籠中火炙死按元史李
守賢傳金
大安初守賢暨兄庭極弟守正守忠從兄伯溫歸
款於穆呼哩太祖即命庭極為崇義軍節度使守賢為
錦州觀察使守忠為都元帥守河東是伯溫與守賢守
正皆兄弟而本傳云伯溫為守賢之孫懿之子又以守
正為伯溫之子舛誤殊甚以時與事
考之有不待辨而自明者今據改

石珪泰姿新泰人宋徂徠先生守道之裔孫也世以耕

讀為業體貌魁偉倜儻不羈金貞祐南渡兵戈四起珪率少壯負險自保與勝陽陳敬宗結義山東宋將鄭元龍以兵來攻珪敗之於毫陽乘勝入盱眙會宋賈涉誘殺漣水軍統轄季先人情不安衆迎珪為帥稱太尉太祖遣使與宋議和珪令麾下劉順直抵塔實干城入覲太祖慰勞順且敕珪曰如宋和議不成吾與爾永結一家之好順還告珪心感服日夜思降未幾宋果渝盟珪棄其妻孔氏子金山仗劍渡淮宋將追之曰太尉廻當

完汝妻子珪不顧宋將沈其妻子於淮珪遂率順來歸
穆呼哩穆呼哩承制授珪濟兗單三州總管後金棄東
平珪與嚴實分守之收輯濟兗沂滕單諸州加山東諸
路都元帥領兵破曹州與金將鄭從宜連戰數晝夜糧
絕援兵不至軍無叛意珪臨陣馬仆被擒囚至汴金主
壯其人誘以名爵欲使揖珪憤然曰吾身事大朝官至
光祿復能受他國封耶假我一朝當縛爾以獻金主怒
蒸殺於市其麾下立社兗州祀焉

攸哈喇巴圖爾渤海人初名興格世農家金末避地大寧會蒙古兵至出保高州富庶寨射獵以為食穆呼哩兵攻寨寨破奔高州及兵圍城下令曰能斬攸興格首以降民皆獲生守者召謂曰汝奇男子吾寧忍斷汝首汝其往降乎不則一城生靈無噍類矣興格乃折矢出降諸將怒欲殺之穆呼哩曰壯士也留之為吾用俾隸麾下從攻通州一夕造礮三十雲梯數十附城州將懼乞降穆呼哩以其功聞太祖賜名哈喇巴圖爾從穆呼

哩畧地燕南為先鋒至大名金將登城督戰哈喇巴圖爾射之中左目其部將開門南奔追殺殆盡授河東北路兵馬都元帥鎮太原時太原新破至則下令軍中凡俘獲人口有親者聽贖無貲者官為贖之民得完聚者衆辛巳金兵攻壽陽縣王胡莊垂破時左右裨將各分兵守險城中見卒不滿百哈喇巴圖爾夜半引甲騎十餘人救之大戰天將明金兵遁去乘虛擣太原西門俘獲其家屬哈喇巴圖爾聞之徑趨西山復奪以還時太

原諸邑皆平唯石家昂及孟州陵井寨忻州清泉寨為
脣齒未下甲申將兵至陵井遣卒叩寨門詐曰納糧芻
守者弗悟門啟徑入衆驚潰遂平其寨清泉寨石家昂
皆降會姦人夜獻太原東門於武仙仙引兵入諸將自
城外呼曰攸哈喇巴圖爾汝當出對曰真定史天倪平陽
李守忠隰州田雄皆失守矣我又棄太原將何面目見
主上乎家屬任公等所俘吾誓與城同存亡遂歿於陣
任志潞州人穆呼哩略地至潞州志首迎降俾充元帥

收輯山寨數與金兵戰輒勝金擒其長子如山以招之
曰降則爾子得生不則死志曰我為大朝之帥豈愛一
子親射其子殪之穆呼哩嘗召諸將議事志亦預徵道
經武安其縣已反志死之其子存襲元帥職金將武仙
攻潞州存亦戰死詔有司廩給其妻孥仍賜第居之存
子立後授潞州長官

耶律特默契丹人父酬格仕遼為都統遼亡不屈節夫
婦俱死金主憫其忠授特默為都統歲甲戌金主徙汴

特默及其子天祐率衆三萬來歸授帥府監軍從元帥史天倪略趙州平棘樂城元氏柏鄉贊皇臨城等縣又從太師穆呼哩收邢洺磁相懷孟諸州有功承制授洺州元帥進兵臨澤潞降其民六千餘戶遷河北西路安撫使致仕居真定天祐襲職金降將武仙據真定叛殺天倪特默父子夜踰城出會天倪弟天澤還自北京遇諸滿城合諸軍南與賊戰遂復真定朝命以天澤襲兄爵而以天祐鎮趙州仙復犯真定天澤潛師出藁城特

默與其妻舒穆嚕氏及家孥之在真定者皆陷仙遣其
僕持書誘天祐曰汝能誅趙州官吏以降當活汝父母
仍授汝元帥不爾盡烹之特黙密令其僕語天祐曰仙
賊狡猾汝所知也母以我故墮其機寃以虧忠節且忠
孝難兩全汝能固守不失國家大計我視刀鋸甘如飴
矣天祐慟哭馳至藁城以賊書示天澤并述父言天澤
曰王陵之事照耀史冊汝能遵父命忠誠許國功不在
王陵下天祐乃趨還趙壁率衆殊死戰仙怒盡殺其家

一十八人及戰仙兵屢挫監軍張林密搆仙黨啟闕納賊天祐倉皇卷戰身被十餘創斬關出會天澤兵夾擊殺林加趙州安撫使以傷憲辭官卒

張萬嘉勢父札呼岱為船橋總管萬戶從西征歿於軍中統二年萬嘉勢從都元帥耨埒入朝授以父官宋兵入成都從行院阿托擊破之至元四年從攻瀘州大敗宋軍殺傷過半七年從攻重慶破朝陽寨圍嘉定柵平康太和懷遠諸寨分兵戍守時諸將攻瀘州往往失利乃詣闕請士任以

攻取之效許之遂率舟師百五十艘自桃竹灘至折魚
灘分守江面謹風火嚴號令尅日進攻先據神臂門為
梯衝登城遂拔之大軍圍重慶將其衆斷馬湖江分兵
水陸往來為游徼復以所部轉餉成都及下流諸屯尋
遷招討使與都元帥伊勒哈討亦奚不薛蠻平之進副
都元帥詔其子孝忠為船橋萬戶以萬嘉努將四川湖
南兵征哈喇章時雲南惡昌多興羅羅諸蠻皆叛殺掠
人民州郡莫能制遂移兵討之殲其衆二十年從征緬

戰死雲南王命其子保通將父軍再征緬入太公城有功
襲副都元帥後從征至甘州山丹亦戰死孝忠少從父
軍中習攻戰至元十九年從討亦奚不薛蠻遇其衆於
會靈關進至沙谿敗之進攻龍家寨阿那闊克之遂攻
亦奚不薛營大破之又以八百人敗阿永蠻於鹿札河
乘勝至打鼓寨連破之諸蠻平還軍成都二十二年從
討烏蒙蠻復擊降大坝都掌蟻子諸蠻二十七年詔從
西征至沙瓜諸州還以本軍萬戶鎮成都卒

按張萬嘉
努鄭義趙

恰 蘭董士元獎 拙五傳元史俱
係列傳今據時事移入忠義

鄭義河間人初事太宗為山東路都元帥兼景州軍民人匠長官從伐金歲壬辰與敵戰於歸德死之弟德溫襲從攻徐州陷陣死子澤龍從萬戶史天澤出征多立戰功年老弟江代其職世祖北征授侍衛親軍副都指揮使中統三年李璮叛據濟南世祖令各州縣長官子弟充千戶於是江子郁為千戶領景州新簽軍敗賊衆於王馬橋璮平郁以例罷江升為武衛親軍都指揮

使至元八年從攻襄陽歿於陣郇襲

趙恰爾未詳何處人始以父任為千戶中統三年守東川從元師竒徹數敗宋軍又從攻大良坪宋督萬壽運糧至渠江之驚灘恰爾邀奪之斬首五十餘級恰爾亦被三創矢鏃中左肩不出竒徹惜其驍勇取死因二人剗其肩視骨節淺深知可出即為鑿其創拔鏃出之恰爾神色不為動至元初為東川路先鋒使尋薦京兆延安兩路新軍戍東安虎嘯山兩城宋揚立以兵護糧至

恰爾率所部兵戰於三重山立敗走棄其糧因盡獲其甲仗旗幟而還屢從行院攻釣魚山又擊敗宋將張珏兵於武勝軍十二年進圍重慶宋將趙安勒兵出恰爾與戰至二鼓敵衆大潰行院上其功未報而疾作乃遣往瀘州治疾至之夕瀘州復叛恰爾與疾出戰與從者二十人皆死之子世顯

董士元一名布哈字長卿文炳長子也善騎射中統初襲叔父文蔚為千夫長出師南征襄漢戍淮西有功從

大帥博爾歡攻揚州駐師灣頭堡時方大暑博爾歡病還京師以行省阿里代領諸軍揚州守將姜才乘隙來攻阿里素不習兵率輕騎數百出堡士元與別將哈喇圖以百騎從之日暮宋兵至者萬餘契續通鑑綱目姜才聞米達將至出步騎五千戰於丁村自夜達旦元兵多敗董士元戰死與木得所戰互異士元謂左右曰丈夫報國正在今日勿懼也方整陣欲戰阿里趣令左旋已乃遁去士元與哈喇圖以部兵赴敵死戰鼓譟震地泥淖馬不能馳乃棄馬步戰至四更敵衆始退及旦

阿里來視戰地見士元卧泥中身被一十七槍甲裳盡赤肩昇至營而絕哈喇圖亦戰死江淮既平已延入朝言於帝曰淮海之役所損者二將而已帝問其人以士元與哈喇圖對帝曰布哈健捷過人畫戰必能制敵夜戰而死可惜也追封趙郡公謚忠愍

樊楫冠州人初為軍吏從參政阿爾哈雅下鄂江陵有
功授都事宋平從入朝改員外郎從定廣西攻厓山累
擢僉荆湖占城行中書省事從征交趾無功而還至元

二十四年復征交趾進行省參知政事時三道進兵皇子鎮南王托歡與右丞程鵬飛分二道一入永平一入女兒關楫與參政烏瑪喇將舟師入海與賊舟遇安邦口楫擊之斬首四千級獲船百餘艘兵仗無算遂至萬劫江合鎮南王兵進攻交趾陳日烜棄城走敢噭堡二十五年王攻敢噭堡破之日烜走入海中交人皆匿其粟而逃張文虎餽餉不至天暑食且盡於是王命班師楫與烏瑪喇將舟師還為賊邀遮白藤江潮下楫舟膠

賊舟大集矢下如雨力戰自卯至酉楫被創投水中賊
鈞執毒殺之至順元年贈上黨郡公謚忠定

班巴爾哈坦氏祖莽賚阿楚克父托倫色勒必從太祖
征伐皆有功世祖即位以班巴爾舊臣子孫擢萬戶命
領諸部軍馬屯守欠欠州至元十二年親王錫里濟圖
卜特穆爾叛奔海都班巴爾以聞且願提兵往討未得
命為彼所襲死焉圖卜特穆爾取其二子巴拉布呼齊
分置左右居歲餘巴拉陰結其近侍圖復仇謀泄南奔

追執之詰曰我遇汝厚甚反為此耶巴拉曰汝背叛君上害我父掠我親屬我誓欲殺汝以報君父仇今力窮被執從汝所為逼令跪不屈與弟布呼齊同被害

綽爾博蘇氏世居汴梁陽武縣從太祖收附諸國有功又從征金歿於陣子綽海從征河南山東復歿於陣子伯特將其父軍從攻郢州繼從太子和克齊西征大理國復歿於陣子阿爾察至元五年授蒙古千戶從圍襄樊復渡江奪陽羅堡岸口以功進蒙古軍總管管領左右

翼兩萬戶軍既下廣德從平章阿簡哈雅征海外國率
死士鼓戰船進奪岸口擒勇士趙安等十六年命管領
蒙古侍衛軍以疾卒於軍

按斡爾三世皆以身殉國元史舊係列傳今移入忠義

伊埒黑色奈曼氏歲丁丑太宗為皇子命與斷事官呼
都拉同署戊戌又同阿穆魯巴圖爾充達嚙噶齊破南
宿州辛丑使宋議和從行者七十餘人伊埒黑色語之
曰吾與汝等奉命南下楚人多詐倘遇變當死焉母辱
君命已而馳抵淮上宋將以兵脅之降伊埒黑色曰吾

持節南來以通國好反誘我以不義有死而已辭氣慷慨不少屈宋將知其不可逼乃囚之長沙飛虎寨三十年而死世祖深悼之詔復其家以子呼都克哈斯為達爾罕日給糧食其家人呼都克哈斯自陳於帝願為國效死為父雪心帝嘉納之授以上均州監戰萬戶至元十八年以招討使將兵征日本死於敵塞伊將黑色
使宋誓死不屈拘囚之歲倍于却經子呼都克哈斯復死于征日本歲由列傳移入忠義而以唐慶附焉唐慶不知何許人事太祖為管軍萬戶歲丁亥使金壬辰太宗

復以慶為國信使取金質子督歲幣以金曹王額爾克

據金

史增來見帝於官山再使慶往令金主黜帝號稱臣金

主不聽慶輒以語侵之金君臣遂謀害慶夜半令兵入

館舍殺之及其弟山祿興祿并從行者十七人既滅金

購求慶屍不得厚恤其家詔官其子仍計其家人口給

糧以養焉

案金哀宗紀飛虎軍事中福蔡元愬
殺北使唐慶等三十餘人與此互異

哈喇布哈伊楞特穆爾子也幼侍母鄂博氏居益都嘗

歎曰幼而不學有不墮吾宗者乎父時以斷事官建牙

保定哈喇布哈往白其志父奇之俾習輝和爾書及經史記誦精敏世祖中統三年李璮叛其母攜季子圖烈布哈避地登萊間音問隔絕號泣徹晝夜繼從從叔父薩奇蘇平賊山東卒奉其母以歸薩奇蘇深器之言於世祖召給宿衛嘗以事至益都於四脚山下置廣興商山二冶以勞授商山鐵冶都提舉未及代以職讓其弟時大兵南伐餽運繁興被選為行都漕運使江南平上疏言親宗室禮大臣以存國家之體興學校獎名節以

勵天下之士正名分嚴考課以定百官之法通泉幣卻貢獻以厚生民之本又言江南新附宜招舊族力繕通商弛征薄入以撫馴其民不然恐上煩宵旰之慮帝多采用其言時阿哈瑪特專政以漕糧漂漏虧耗責償舟人哈喇布哈伏闕抗言量之跨贏出於原降而水道之虞非人力所及且彼雖罄其家不足以償苟朝廷必不任虧損臣請獨當其辜詔勿治阿哈瑪特銜之出為寧海路達嚙噶齊厯改廣東都轉運鹽使討平陳良臣之

亂條鹽法之不便者悉除之劇賊歐南喜僭王號聚衆至十萬與都元帥圖魯卜哈雅等分兵搥之未幾右丞索多督兵征占城交趾屬護餉道北至東莞博羅界遇賊歐鍾等橫絕石灣鋒銳甚哈喇布哈且戰且行矢竭馬創徒步格鬪為所執賊砍奉之為主不屈遂遇害贈戶部尚書謚忠愍其後子孫相繼登第人以為忠義之

報云

劉天孚字裕民大名人由中書譯史厯知許州屬襄城

與葉縣接壤南為湛河襄城民食滄鹽葉民食解鹽刻
石河南岸為界葉令有貪者陰徙石於北二里誣其民
食私鹽逮治百餘家兩縣鬪不已天孚為考其原界移
石故處而葉令被罪去歲旱蝗天孚令民出捕俄羣鳥
來啄蝗為盡明年麥熟時有青蟲如蠶食麥忽生大花
蟲盡嚼之許人立碑頌其事仁宗延祐中遷知河中府
視事甫兩月會周王和實拉出鎮雲南道經陝西行省
丞相阿斯罕意不平且謀舉兵向闕先入河中方坐府

治號令諸軍天孚佩刀直前衆遏之不得進退謂幕僚

王從善等曰吾家本微賤荷朝命至此今不幸遭大變

何忍從逆而負上恩哉且與其辱於逆賊之手吾寧蹈

河以死遂拂衣出時天寒河水方堅天孚拔所佩刀斫

冰開北望再拜已脫衣帽岸滌投水中死贈彭城郡侯

謚毅

蕭景茂漳州龍溪人性孝友家貧力農順帝至元四年
南勝縣民李智甫作亂掠龍溪景茂與兄佑集鄉丁拒

之據觀音山橋險與賊戰敗被執賊脅使從已景茂曰
我生為大元民死作隔洲鬼豈從汝為逆耶隔洲其所
居里也賊怒縛景茂於樹嚼其肉使自啖景茂益憤罵
賊遂以刀決其口至耳旁罵不絕聲而死朝命褒之仍
給錢以葬

張桓字彥威真定藁城人父木知汝寧府因家焉桓以
國子生釋褐累官陝西行臺監察御史以言事不合去
劉福通陷汝寧桓避居確山賊知其名襲獲之羅拜請

為帥弗聽囚六日擁至渠魁前桓據榻坐與之抗論順逆其徒捽桓起跪桓詈叱彌厲屢唾賊面賊謂曰汝但

一揖亦恕汝死桓瞋目曰吾恨不能斬逆首肯聽汝誘

脅而折腰哉賊知不可屈遂刺之後語人曰張御史真

鐵漢害之可惜事聞贈禮部尚書謚忠潔

案輟耕錄云
桓謝賊居確

山縣而陷賊賊魁素聞桓有治績置上座脇之受偽官
桓唯之遂縛桓妻孥九人至先殺妾次殺子女以及妻
每殺一人則謂桓曰御史若降條可免桓
弗為動此至正辛卯八月事所載較詳

李黼字子威潁州人父工部尚書守中性卞急遇諸子

極嚴每一飲酒輒半月醉不解舩百計承順求寧親心不可得嘗跪而自訟無幾微厭怠意初補國學生泰定四年遂以明經魁多士授翰林修撰厯監察御史首言祿祠烝嘗古今大祭今太廟唯二祭而日享佛祠神非禮也宜據經行之成均教化之基不當隸集賢宜屬省臣薦領諸侯王歲賜有定額分封易代之際世系戚疏無成書可攷宜倣先代修正玉牒皆不報遷宣文閣監書博士薦經筵官每以聖賢心法為帝言之命巡視河

渠黼上言曰蔡河源出京西宋以轉輸之故平地作堤今河底填淤高出地面秋霖一至橫潰為災宜按故迹修浚他日東河或有不測之阻江淮運物當由此分道達京萬世之利也亦不報出為江州路總管至正十一年盜起北據徐蔡南陷蘄黃焚掠數千里九江居下流為江東西襟喉地黼治城壕修器械募丁壯分守要害且上攻守之策於行省請兵屯江北以扼賊衝不報黼嘆曰吾不知死所矣十二年徐壽輝兵渡江陷武昌威

順王及省臣相繼遁舳艤蔽江而下江西大震賊乘勝
破瑞昌右丞博囉特穆爾方治軍江上聞之亦遁
立辭氣愈奮厲時黃梅主簿伊遜特穆爾願出擊
賊大喜向天灑酒與之誓賊游兵已至境急檄諸鄉落聚
木石於險塞處遏其歸路倉卒無號乃墨士卒面統之
出戰黼身先士卒大呼陷陣伊遜特穆爾繼進賊大敗
逐北六十里還謂左右曰賊不利於陸必由水道以舟
薄我苟失備禦吾屬無噍類矣乃以長木數千冒鐵椎

於杪暗植沿岸水中逆刺賊舟謂之七星橋會西南風急賊舟數千果揚帆順流鼓譟而至舟遇橋不得動黼帥將士奮擊發火翎箭射之焚溺死者無算行省上其功拜江西行省參政行江州南康等路軍民都總管便宜行事命未下而賊勢更熾荆湖淮甸守臣往往棄城遁黼提屨旅中外援絕賊薄城黼引兵登陴布戰具賊已入與之巷戰知力不敵揮劍叱賊曰殺我母殺百姓賊自項背來刺黼墮馬與從子秉昭俱罵賊而死郡民

相率具棺葬於東門外。黼兄冕居潁上，亦死於賊，秉昭

冕季子也。事聞，封黼隴西郡公謚忠文，詔立廟江州，賜

額曰崇烈官其子秉方集賢待制。

集賢耕錄云初武昌
臨時黼謂子秉方曰

我國之守臣當死此土，汝可奉母往下江，依伯父以存吾後。秉方曰：「父死國子死，父有何不可？」黼怒曰：「汝不遵命是不孝也！」秉方亦勸其兄曰：「若不去，則叔父無後，不孝莫大於是。」某當與叔父同生死矣。秉方不獲已，買舟奉母行去。不半月，黼死云云。李氏一門忠孝，史傳未及詳載。

李齊字公平，廣平人。家貧，客於江南，工辭章。元統元年賜進士第一，厯簽河南淮西廉訪司事，移知高郵府，至

正十三年泰州白駒場亭民張士誠為亂破本州淮南

行省

淮南史傳訛河南
據續宏簡錄改

遣齊往招降被拘久之其黨自

相攻殺始縱齊歸士誠佯請降行省授以民官未幾復

鼓變殺參政趙璉掠官庫走入得勝湖俄陷興化時左

丞竒徹圖方鎮高郵使齊守甓社湖齊既出高郵遂陷

賊蔓延入寶應會有詔赦叛者使至高郵不得入賊給

曰必李知府來乃受詔行省強齊往至則下齊獄中齊

益聲言士誠本無降意特還延為繕飭計耳官軍謀知

進攻城士誠呼齊出使跪齊叱曰吾膝如鐵豈肯為賊
屈士誠怒扼之跪齊立而詣乃曳倒搥碎其膝而剮之
論者謂大科三魁若台哈布哈沒海上李黼隕九江泊
齊之死皆不負所學云

褚布哈字君實隰州石樓人泰定初補中瑞司譯史歷
簽河西道蘆訪司事未幾移淮東紅巾賊蔓延兩淮勢
張甚布哈行郡至淮安極力為守禦計賊至多所斬獲
且請知樞密院婁章以判官劉甲守韓信城相犄角為

聲援復上章劾總帥逗撓狀朝廷錄其功升廩訪使甲有智勇與賊戰輒勝賊憚之布哈頗賴焉總兵者嫉其劾已檄甲別將兵擊賊冀以困布哈甲去韓信城陷賊乃掘塹相銜捷水寨以圍淮安布哈知事危退入城時城三面皆賊惟北門通沐陽倚其芻餉而赤鯉湖為賊據沐陽之路又絕食且盡攻圍日急總兵者屯下邳按兵不出遣使十餘輩告急皆不應凡草木螺蛤魚蛙燕鳥及鞚皮鞍韂革箱敗弓之筋皆盡而後人相食撤屋

為新民多露處力窮城陷布哈猶據西門力鬪中傷見執為賊所縛次子伴格冒刃護之亦見殺時至正十六年十月乙丑也布哈守淮安五年身經數百戰精忠大節人比之張巡云朝廷聞之追封衛國公謚忠肅

郭嘉字元禮濮陽人祖昂父惠俱以戰功顯嘉慷慨有大志登泰定三年進士第累官廣寧路總管屬盜起詔團結義兵嘉招集民數千教以坐作進退號令齊一賞罰明信東方甲兵之精稱嘉為最至正十八年劉福通

黨由大同焚掠上京嘉躬率義兵出禦既而遼陽陷孤城無援嘉嘆曰自我祖父有勲王室今之盡忠吾分內事也況身守此土當生死以之餘不足恤頃之賊至圍城亘數十里有大呼者曰遼陽我得矣何不出降嘉挽弓射呼者中其左頰墮馬死賊稍引退嘉開西門逐之賊大至力戰以死事聞封太原郡公謚忠烈

喜同河西人本姓周由後宮衛士任南陽縣達嚙噶齊居二歲劉福通兵抵南陽境縣素無城且乏守卒喜同

即以死自許與家人訣曰吾與汝等不能相顧矣乃策
厲義兵奮力與賊搏賊知無後援戰愈急南陽陷喜同
突圍賊橫刺其馬馬蹶喜同鞭馬躍而起手斬刺馬者
為他賊所追身被數創不能闢遂見執為所殺妻邢氏
帥家僮數人出走遇賊奪其刀斫之且罵且前亦見殺
一家死者二十餘人時襄陽錄事司達嚙噶齊塔布岱
字產暉元統元年進士魏王軍汝毫塔布岱來供餉王
嗜酒輕戰備一夕賊劫王王卧未能起為所執塔布岱

馳騎奪王亦為賊所得比明見賊首王拜乞活塔布岱以足蹴之曰王猶欲生乎賊復屈其拜塔布岱拒而詣之且與縛者角遂被支解

韓因字可宗汴梁人少習舉子業負氣不羣劉福通據汝寧官軍討之久不下會朝廷詔赦叛逆募可持詔入賊者因應命假以唐州判官使焉賊渠恐其黨心搖止因於外納詔不讀旋縱因歸報因出乘馬周賊屯大呼曰汝輩好百姓何不出降歸田里而甘從逆賊驅使耶

衆愕眙相顧賊渠追因責其所言因極口肆詈賊怒寸割之

卞琛大名人家世力農早游學京師補國子生既而丁母憂仍服農於家至正十二年鄰郡盜起剽掠至其境琛與從子小十府史李仲亨等協謀統丁壯數百人出擊民兵無弓矢直以鈎鉏白鎌當賊賊矢雨集琛衆潰散被擒仲亨小十皆死賊素知琛名謂曰從我解汝縛不從殺汝琛唾曰我國子生也視汝輩真狗彘耳吾寧

義死不從賊生遂見殺

喬彞字仲常晉寧人性高介有守至正十八年叛將王士誠襲晉寧城陷城中死者十二三彞家有大井乃令妻子婢輩循次投井中而已隨赴之士誠素知彞名使人即其家邀致之至則已死矣賊平賜謚純潔有張嵒起字傳霖汾州人嘗為國子助教免歸盜自晉寧陷汾州嵒起與妻赴井死王佐字元輔晉寧人賊至為所獲詣賊不輟因見害又有吳德新者字止善建昌人工醫

留京師偶往晉寧會盜至見執脅使降不從賊加白刃
頸上德新罵不已乃曳之井上陽欲擠之德新即自投
井中仰罵賊賊下射矢貫其頂罵益力賊怒以長槍刺
之復憐其死以土埋井而去

顏瑜字德潤曲阜人充國復聖公五十七代孫也以行
誼舉為鄒及陽曲兩縣教諭至正十八年義兵萬戶田
豐叛陷東平瑜攜家走鄆城道遇賊曰爾何人瑜曰我
東魯書生也賊曰爾書生可從我見主帥瑜罵曰爾賊

何主帥邪賊怒欲殺之瑜無懼色復使之寫旗瑜大詭
曰爾本大元百姓會天下亂募爾為兵而反為叛逆我
腕可斷豈能為爾寫旗從逆乎賊以槍刺殺之妻子皆
被害有曹彥可者亳州人當妖寇起里中多無賴子不
知書既破毫揭帛於竿羣趨彥可家劫之使寫旗彥可
辭乃迫以刃彥可唾曰我儒者知有君父豈為汝寫旗
者賊怒遂見害年七十矣事聞賜謚節愍

王士元字堯佐恩州人泰定四年進士由棣州判官累

遷知磁州值軍興餉日繁士元惟惜民力雖被將士
呵責弗顧也改知濟州州濱黃河嘗經盜賊雉堞不完
至正十七年賊復迫城守兵潰散士元坐堂上顧其子
致微使避曰吾守臣居此職也若可逃生子侍立不忍
去賊前問曰爾為誰士元叱曰我王知州也強賊識我
否賊欲縛之士元奮拳擊賊賊怒并其子殺之

楊樸字文素河南人早以文學推擇為吏任滁州全椒
縣尹行省參政額森總兵於滁縱飲不理軍事至暮城

門不鑰寇入縱火猶張燭揮杯急踰城走樸度必死盡
殺其妻女朝服坐堂上盜欲降之樸指妻女示曰我已
戕我屬政欲死官守耳尚何云哉連唾之賊繫樸倒懸
樹上割其肉至盡猶大罵弗絕

欽定續通志卷五百二十